

Erngup imigassap pitsaassusia aamma imermik pilersuiviit nakkutigineqarnerat pillugit Namminersornerullutik Oqartussat nalunaarutaat

Avatangiisit innarlitsaaliorneqarnissaannik Inatsisartut peqqussutaanni nr. 12-imi 22. december 1988-imeersumi § 7, imm. 2, nr. 1 aamma 2, § 15, § 30 a aamma § 46, imm. 2 naapertorlugit kingusinnerpaamik Inatsisartut peqqussutaatigut nr. 8, 15. november 2007-imeersumi aammalu Inuussutissanik nersutillu nappaataannik inunnut tunillaassorsinnaasunik nakkutilliineq pillugu Inatsisartut peqqussutaat nr. 17, 28. oktober 1993-imeersumi § 3 a, § 4 a, § 6, § 9 a, § 11 a, § 15, imm. 2 naapertorlugit kingusinnerpaamik Inatsisartut peqqussutaatigut nr. 9, 31. maj 2001-imeersukkut allanngortinneqartumi, aalajangersarneqarput:

Kapiteli 1

Atuuffii nassuiaatillu

§ 1. Nalunaarummi matumani aalajangersarneqarput:

- 1) Pitsaassutsikkut piumasaqaatit, inuussutissalerinermi imermut imerneqartartussamut, imermut sukuluiaaangitsumut imermullu atorineqartussat naammassineqarsimasussat.
- 2) Misissuinerit suut, taakkununga ilanngullugit misissugassanik misissoqqissaagassanillu tigusinerit qanoq akulikitsiginissaat, imermut sukuluiaaangitsumut aamma imermut imerneqartartussamut tunngatillugit suliarineqartartussat.
- 3) Qanoq iliorluni erngup imerneqartartussap pitsaassusaanik nakkutilliisoqarlunilu misissuisoqartassanersoq.
- 4) Piumasaqaatit allat suut, ilassutaasumik aalajangiisartunik misissueqqissaarinissami piumasaqaatigineqarsinnaanersut, nalunaarummi matumani taaneqanngitsut.
- 5) Erngup annertussusaat pissarsiarineqartut qanoq iliorlutik misissorneqartassanersut, takuuk ilanngussaq 2A-C.

Imm. 2. Nalunaarummut ilaatinneqanngillat:

- 1) Imeq sukuluiaaangitsoq siunertanut atorineqartartoq, atusut peqqissusaannut toqqaannartumik toqqaannangitsumilluunniit sunniuteqartartoq, imaluunniit uumasunut imissatut atorineqartartoq.
- 2) Imeq sukuluiaaangitsoq imerlu imerneqartartoq, nakorsaatitut atorineqartartoq.
- 3) Aasaanerani erngup aqqutai, nalinginnaasumik imermik pilersuinerimut inuussutissalerinermulluunniit pilersuinerimut ilaatinneqartanngitsut.
- 4) Imermik pilersuiviit, ullormut unnuamullu ataatsimut 10 m³ inorlugu pilersuisartut arrortinneqarsinnaanngitsunik akoqarneranut aalajangiisartut eqqarsaatigalugit ilanngussaq 1B-miittut.

§ 2. Nalinginnaasumik inuussutissaleriffinnullu imermik pilersuiviit nalunaarut manna naapertorlugu pisortanit nakkutigineqartartussanut ilaatinneqarput.

Imm. 2. Imermik pilersuiviit allat, § 5, imm. 3 malillugu, nalunaarut manna naapertorlugu pisortanit nakkutilliisarnermut ilaatinneqanngitsut, takukkilli §§ 31-33 aamma 36.

§ 3. Nalunaarummi matumani imatut paasineqassapput:

1) Imeq imerneqartartoq:

a) Erngit qanorluunniit ittut suliarineqarsimasut suliarineqarsimanngitsullu inunnoortut, illumi iganermi atugassiat, paaqqinnittarfinnut namminersortunut pisortanillu pigineqartunut, assersuutigalugit atuarfiit, napparsimaviit, paaqqinnittarfiit kiisalu aningaasannanniutigalugu siunertanut, soorlu neriniartarfinnut, akunnittarfinnut, angalasut unnuisarfinut aamma mittarfinnut.

b) Erngit qanorluunniit ittut inuussutissaleriffinni tunisassianik sananermi, passussinermi aanaveersaanermi imaluunniit akuutissani nerisassatut aalajangiussani atorineqartartut.

2) Imeq sukuluiaaangitsoq: Imeq salinneqanngitsoq, pilerfimmunit qanoq ittuunera apeqquaatinnagu pinngoqqaarnerminiillu imermik imerneqartartussanik pilersitsinermi atorineqarsinnaasoq.

Assersuutigalugit imeq tatsineersoq, imeq nunap iluaneersoq, imeq tarajulik aamma sermersuup sermitaanit aassimasumeersoq.

§ 4. Nalunaarummi matumani imatut paasineqassapput:

1) Imeqarfik: Taaguut paarlakaallugu atorineqartartoq imermik sukuluiaavimmut aamma imermik tigooraavimmut, akuttunngitsumillu atorineqartartoq taagutitut inatsisiliornikkut immikkoortumut, tassunga atuisut akiliuteqartarput.

2) Imermik tigooraaviit: Imermik kuuffilerlugit tigooraaviit, qillikkat, puilasuat, imermik sukuluiaaangitsumik pumpilerlugit tigooraaviit aamma erngup sukuluiaaangitsup aqqutai.

3) Imermik sukuluiaaviit: Suliarinnittarfik tassani imeq sukuluiaaangitsoq salinneqartarluni imertut imerneqartartussatut atugassanngortinniarlugu. Imermik sukuluiaaviit immikkoortunik makkuninnga sananeqaateqarsinnaavoq: Imermut sukuluiaaangitsumut tankit, silaannalersuisarfiit, nakkartitsiviit, minguaaviit, tappiorannartunik unerartitsiviit, imermut mingoqanngitsumut tankit, kuutsitsiviit, tarajuaaviit, aassiisarfiit ilaalu ilanngullugit.

4) Imermik pilersuiviit: Suliarinnittarfik ataatsimik arlalinnulluunniit tulliuttunik immikkoortortalik: Imermik tigooraaviit, imermik sukuluiaaviit kiisalu pingaarnerusutigut aasaanerani erngup aqqutai. Imermik pilersuiviit imermik tigooraavinnik arlalinneq imermik pilersuisunik sananeqaateqarsinnaavoq.

§ 5. Nalinginnaasumik imermik pilersuivittut paasineqassapput pisortanit illoqarfinnik nunaqarfinnillu imermik pilersuiviit.

Imm. 2. Inuussutissaleriffiit imermik pilersuivii paasineqassapput imermik pilersuivittut, taamaallaat inuussutissaleriffinnut imermik pilersuisut.

Imm. 3. Imermik pilersuiviit allat paasineqassapput illoqarfiit nunaqarfiillu killeqarfiisa avataani imermik pilersuivittut.

§ 6. Pingaarnerusutigut erngup aqqutaa paasineqassaaq erngup kuuffiatut, imeqarfimmiik erngup aqqutaanut pingaannginnerusunut, imertarfinnut qatserisartullu imermik tiguisarfinut imermik suliarineqarsimasumik ingerlatsivittut.

Imm. 2. Aasaanerani pingaarnerusutigut erngup aqqutaatut aamma aasaanerani erngup aqqutaatut pingaannginnerusutut paasineqartarput erngup kuuffii, ataavartumik atorineqartartuunngitsut.

Imm. 3. Erngup aqqutaatut pingaannginnerusutut paasineqartarpoq kuuffik, pingaarnerusutigut erngup

aqqutaanik imermut atortulersuummut atassuserneqarsimasoq. Erngup aqqutaa pingaannginnerusoq tamatigit inuinnarnik pigineqartartuuvoo, aamma pisortat illuutaannut soorlu assersuutigalugit atuarfinnut, napparsimavinnut paaqqinnittarfinnulluunniit imermik pilersuisuusoq.

§ 7. Illuni imermut atortulersuutitut paasineqassapput atortulersuutit, imermut imerneqartartumut atorneqartartut aamma:

- 1) aasaanerani erngup aqqutaa pingaannginnerusoq, pingaarnerusumik erngup aqqutaanut atassuserneqarsimasoq,
- 2) imermut tanki aamma
- 3) ruujorit, ruujorinut atortuusinnaasut tamaasa, atassuteqaatit ilaalu ilanngullugit.

Imm. 2. Imermut tanki, takuuk imm. 1 nr. 2 paasineqassaaq atortulersuutitut, imermik imerneqartartumik imermik assartuummit imaluunniit aasaanerani erngup aqqutaanit pingaannginnerusumit pilersorneqartartoq, illumilu imermut atortulersuutitut attavilerneqarsimasoq. Imermut tanki tamatigit inuinnarnik pigineqartartuuvoo, aamma pisortat illuutaannut soorlu assersuutigalugit atuarfinnut, napparsimavinnut paaqqinnittarfinnulluunniit imermik pilersuisuusoq.

Imm. 3. Atuisut imermik atortulersuutaasut paasineqassapputa atortulersuutit tamarmiusut, illuni ingerlatseqatigiiffiniluunniit imermik imerneqartartumik agguuassisarnermut ilaasutut.

§ 8. Inuussutissalerinermik ingerlatsivittut paasineqassapput ingerlatseqatigiiffiit, inuussutissarsiuutigalugu inuussutissanik, taakkununga ilanngullugit imermik imerneqartartumik puiaasanut allanulluunniit poorlugit suliarinnittartut, paarinnittartut, assartuisartut imaluunniit nioqquteqartartut.

§ 9. Ingerlatsinikkut nakkutilliinertut paasineqassaaq suliffeqarfimmi erngup pitsaassusaanik nakkutilliineq, annertussusiliinermik nakkutiginninneq assigisaannillu suliarinnittarneq imermik pilersuivinni ingerlatsinikkut sulisuusunik isumagineqartartunik.

Imm. 2. Ingerlatsinikkut allattaavittut paasineqassaaq ilaatigut ingerlaavartumik paasissutissanik katersisarneq, tassani imermik pilersuivinni ingerlatsinikkut sulisuusunit annikinnerpaamik annertussusiliinernik nalunaarsuisartut assersuutigalugit klorimik, sodamik, misiligutissatut tigusassanik erngullu pitsaassusianik uuttortaasarnernik ilanngussaq 3B naapertorlugu.

Imm. 3. Ingerlatsisuusutut paasineqassaaq inuk aaqqissuussinerluunniit, imermik pilersuivimmik ingerlatsinermut akisussaasoq.

Kapiteli 2

Oqartussaannermut akisussaasuunermillu tunngasut

§ 10. Nalunaarut manna naapertorlugu qitiusumik nakkutilliinikkut oqartussaasoq tassaavoq avatangiisinut, uumasuteqarnikkut pissutsinut aamma peqqissuunermut naalakkersuisoq.

Imm. 2. Qitiusumik nakkutilliinikkut oqartussaasup atuisut ilisimatittassavai erngullu pitsaassusia pillugu nalinginnaasumik ilitsersortassallugit.

Imm. 3. Imermik pilersuivinnut pisortanit nakkutilliinermut ilaatinneqanngitsunut, § 2 imm. 2 naapertorlugu, qitiusumik nakkutilliinikkut oqartussaasoq atuisunut pineqartunut ilitsersuusiortassaaq erngup pitsaassusia pillugu paasissutissanik taassuminngalu illersuineq pillugu.

Imm. 4. Qitiusuunngitsumik nakkutilliisarneq peqqissutsimut naalakkersuisoqarfimmit ingerlanneqartassaaq.

Kapiteli 3

Pisortanit nakkutilliineq

§ 11. Uumasuuteqarnikkut pissutsinut naalakkersuisoqarfimmit qitiusumik nakkutilliineq ingerlanneqartarpoq makkununga tunngatillugit:

- 1) Erngup imerneqartartup tappiorannartunik, uumasunik miluuttunik, nappaatinillu tunillaassuisartunik virusinik ilaallu ilanngullugit imaqarsinnaanerani ilanngussaq 1A-mi pitsaassutsimut piumasaqaatit naapertorlugit aamma nakkutilliinerup qanoq akulikitsigisarnissaanik ilanngussaq 2A-C naapertorlugit.
- 2) Tunillannartuiaanerup pimoorusuisutiginera, tunillannartuiaammik atuiffusuni.
- 3) Laboratoriat tappiorannartunik misissuisartuusut pitsaassutsimik qularnaarinniisarnermi periusaanik.

Imm. 2. Avatangiisinut Naalakkersuisoqarfimmit qitiusumik nakkutilliineq ingerlanneqartarpoq makkununga tunngatillugit:

- 1) Erngup imerneqartartup akui pissusialu, kiisalu akoorutissanik imaqarnera ilaalu ilanngullugit ilanngussaq 1B-C-mi pitsaassutsimut piumasaqaatit naapertorlugit aamma ilanngussat 2A-C, 3A aamma 3B-imi nakkutilliinerup akulikissusii naapertorlugit kiisalu ingerlatsinikkut nakkutilliineq tunngavigalugu.
- 2) Imerkik pilersuiviit, takukkit §§ 4-8, taakkununga ilanngullugit pilersuiviup aaqqissugaaneratigut atorsinnaassusiatigut aserfallatsaalineqartarneratigullu qanoq ittuuneri.

Imm. 3. Peqqissutsimut Naalakkersuisoqarfimmit qitiusuunngitsumik nakkutilliineq makkunani isumagineqartarpoq:

- 1) Tappiorannartunik ilaalu ilanngullugit erngup pitsaassusianut tunngatillugu qanoq akoqartiginera, ilanngussaq 1A-mi pitsaassutsikkut piumasaqaatit naapertorlugit aamma ilanngussaq 2A-C-mi nakkutilliinerup akulikissusia naapertorlugu.
- 2) Tunillannartuiaanerup pimoorusaanera, tunillaannartuiaatinik atuiffusuni, tassunga ilanngullugit imermik misissugassanik tiguisoqartarnerata taakkualu misissoqqissaarneqartarnerisa qularnaarneqarnerat.

§ 12. Peqqinnissaqarfimmi nakorsaaneqarfimmit nakkutilliinermi oqartussaasoq siunnersorneqartarpoq qitiusumik qitiusuunngitsumillu nakkutilliinerani ilanngussaq 1A-C-mi pitsaassutsikkut piumasaqaatinut tunngatillugu aamma ilanngussaq 2A-C-mi nakkutilliinerup akulikissusissaanut tunngatillugu.

§ 13. Qitiusumik nakkutilliinermi oqartussaasumit § 10 naapertorlugu, peqqissaaveqarfimmi nakorsat qullersaat piginnaatissinnaavaa qitiusumik nakkutilliinermik isumaginnittaqqullugu § 11 naapertorlugu.

§ 14. Qitiusumik nakkutilliinermik oqartussaasumit imermik misissugassanik tiguisarnermi nakkutilliinerup akulikissusia sivitsorsinnaavaa sivikillisinnaalluguluunniit ingerlatsisuusup ingerlatsinikkut nakkutilliinermi naliinerata kingorna, takuuk ilanngussaq 3A.

Imm. 2. Aalajangerneqarsimalerpat, ilanngussaq 1B aamma 1C-mi misissueqqissaarnikkut aalajangiisartunit ataaseq arlallilluunniit pigineqanngippata, qitiusumik nakkutilliinermik oqartussaasumit imermik misissugassanik tiguisarnermi nakkutilliinerup akulikissusianik sivikillisitsisinnaavoq ingerlatsisuusumit avatangiisinut naalakkersuisoqarfimmut qinnuteqareernerata kingorna.

Kapiteli 4

Ingerlatsisuusup pisussaaffi

§ 15. Ingerlatsisuusumit qitiusumik qitiusuunngitsumillu nakkutilliinermik oqartussaasup peqqusineratigut imermik pilersuiffup eqqaani imermik misissugassanik tigutsiviusartuq pillugu ilisimatitsisoqassaaq.

§ 16. Nalinginnaasumik imermik pilersuinnermut ingerlatsisuusup isumagisaraa erngup imerneqartartup akuinut pissusianullu tunngatillugu erngup pitsaassusiata nakkutigineqarnerani ingerlatsinikkut nakkutilliineq takuuk ilanngussaq 1B.

Imm. 2. Ingerlatsinikkut nakkutilliineq imermik suliarinnittarnermut, kiisalu erngup sukuluiagaanngitsup aamma erngup imerneqartartup pitsaassusianik nakkutilliinermi angusanut naapertuuttunngortinneqartassaaq

§ 17. Ingerlatsisuusup akisussaaffigaa qulakkiissallugit § 19, 20, 21 aamma § 23 eqquutsinneqarnerisut.

Imm. 2. Ingerlatsisuusumit akisussaaffigineqarpoq atortut, imermik pilersuivinnut ilaatinneqartut aammalu imermut atorineqartartut, taamaattuunissaminut akuersissutigineqarsimanerat.

Imm. 3. Qaqugukkulluunniit illumik piginnittuusup akisussaaffigaa, illumi imermut atortulersuutit malittarisassat naapertorlugit suliarineqarsimanerat.

Imm. 4. Imermik pilersuivinnut tamanut ingerlatsisuusooq, § 2, imm. 1 naapertorlugu, qitiusumik nakkutilliinermut oqartussaasumik piumaffigineqarsinnaavoq erngup pitsaassusaanik ilanngussaq 3A naapertorlugu ingerlatsinikkut nakkutilliinermut periutsimik pilersitseqqullugu.

§ 18. Nalinginnaasumik aamma inuussutissalerinermik ingerlatsivinnut imermik pilersuivinnut ingerlatsisuusooq, qaqugukkulluunniit qitiusumik qitiusuunngitsumillu nakkutilliinermik oqartussaasut piginnaatissinnaassavai nalinginnaasumik soorluttaarlu ilassutaasumik imermik misissugassamik tiguisinnaanissaannut erngup pitsaassusianik nakkutilliinissamut kiisalu imeqarfup aaqqissuunneqarneranik, ingerlanneqarneranik il.il. nakkutilliinissamut.

Kapitli 5

Erngup pitsaassusissaanut piumasaqaatit

§ 19. Imeq imigassatut atorineqartartoq, tappiorannartoqaranilu stoffinik akuugaanngitsunilluunniit allanik peqqinnissakkut navialissutaasinnaasunik ima annertutigisumik akoqassanngilaq, annikinnerpaamillu imermi tappiorannartoqarsinnaaneranut stoffeqarsinnaanerannullu ilanngussaq 1A-Cmi nalunaarneqarsimasutut killiliussanik eqquutsisisimassalluni.

Imm. 2. Imm. 1-mut ilaatinneqanngilaq imeq imerneqartartooq avammut nioqqutissiornissaq siunertaralugu tunisassiarineqarsimasooq.

§ 20. Imeq nalinginnaasumik imermik pilersuinnermit pilersuutigineqartartup imaluunniit inuussutissalerinermik ingerlatsiveqatigiiffinni atorineqartartup, pitsaassutsissakkut piumasaqaatinik eqquutsisisimassaaq sumiiffinni tulluuttuni § 19-imi aalajangersarneqarsimasuni:

- 1) Imeq imermik pingaarnerusutigut aqquutinit, pisortat imertartarfinit, biilinit tankilinnit aamma umiarsuarnit tankilinnit kuutsinneqartartoq.
- 2) Imeq puiaasanut poortuutissanulluunniit allanut immiunneqartartoq.
- 3) Imeq inuussutissalerinermik ingerlatsivimmit atorineqartartoq.

§ 21. Erngup sukuluiagaanngitsup pitsaassusia, ingerlatsisuusumit qinnuteqaateqareernikkut atorineqalinnginnermini qitiusumik nakkutilliinikkut oqartussaasumit akuersissutigineqarsimassaaq, takuuk ilanngussaq 2A.

§ 22. §§ 19-21 naapertorlugit misissuinnernit angusat takutippassuk, erngup pitsaassusiata nalunaarummi matumani piumasaqaatit naapertunngikkai, ingerlatsisuusumit erniinnartumik qitiusumik nakkutilliinermik oqartussaasooq ilisimatinneqassaaq.

§ 23. Ingerlatsisuusumit imermik misissugassat laboratorianut, taamaasiornissamut qitiusumik nakkutilliinermik oqartussaasunit akuersissutigineqarsimasunut nassiunneqartassapput.

Imm. 2. Ingerlatsisuusoq imermik misissugassanik tiguisassaaq laboratoriami imermik misissuisarnermut ilitersuut naapertorlugu. Imermik misissuisarnermut ilitersuut qitiusumik nakkutilliinermik oqartussaasunit akuersissutigineqassaaq.

Imm. 3. Erngup pitsaassusaanik nakkutilliinissami peqqissaaveqarfimmi nakorsat qullersaanit imermik misissugassamik tiguisarnek isumagineqartassaaq tappiorannartoqarneranut kiisalu tunillannartuiaanerup pimoorussamik ingerlanneqarneranut atatillugu, ilanngussaq 1A-mi pitsaassusissamut piumasaqaatit naapertorlugit aamma qanoq akulikitsigisumik nakkutilliisoqartarnissaa naapertorlugu ilanngussaq 2A-C malillugu misissueqqissaarnermi periutsit ilanngussaq 4-imiittut atorlugit.

Imm. 4. Ingerlatsisuusup ingerlatsineri nakkutilliineq tunngavigalugu erngup sukuluiagaanngitsup aamma erngup imerneqartartup akuinut pissusianullu pitsaassutsimut piumasaqaatit ilanngussaq 1B-C-miittut aamma nakkutilliinerup akulikissusissaanut ilangussaq 2A-C, 3A aamma 3B-tut naapertorlugit imermik misissugassamik tiguisarnek isumagissavaa.

Imm. 5. Imm. 1-miit 4-imut ilaatinneqanngillat imermik misissueqqissaarnerit uuttortaanerillu, sumiiffimmi ingerlanneqartut ingerlatsisuusumik nalinginnaasumik aamma inuussutissalerinermik ingerlatsiviit imermik pilersorneqarnerinut atorneqartartut, taamatut ulluinnarni ingerlatsinikkut nakkutilliinermut atatillugit. Qitiusumilli nakkutilliinermut oqartussaasoq qaqugukkulluunniit piumasaqaateqarsinnaavoq taamatut misissueqqissaarnerit uuttortaanerillu pitsaassuseqarnissaanik, kiisalu ingerlatsisuusup suliffeqarfimmi pitsaassutsimik nakkutilliisarneranut, takuuk ilanngussaq 3A.

Kapiteli 6

Imermik misissugassanik tiguisarnermut nakkutilliinerup akulikissutsit

§ 24. Qitiusumik nakkutilliinermik oqartussaasumit aalajangersarneqartarput nalinginnaasumik aamma inuussutissalerinermik ingerlatsiviit imermik pilersorneqarnerinut atorneqartartut nakkutigineqartarnissaanut akulikissusissaat makku tunngavigalugit:

- 1) erngup sukuluiagaanngitsup aamma imerneqartartup pitsaassusia, takuuk ilanngussaq 1A-C,
- 2) imermik pilersuinerup annertussusia, takuuk ilanngussaq 2B-C, aamma
- 3) maannakkorpiak imermik suliarinnittarneq.

Imm. 2. Imermik misissugassanik tiguisarnermut nakkutilliinerup akulikissusissaa aalajangersarneqassaaq, taamaasilluni misissueqqissarnermi angusat ukioq kaajallallugu erngup pitsaassusianut sanilliunneqarsinnaaniassammata, upernaakkut, aasaanerani naasut naalernerinut naapertuuttunngortillugit, ukiakkut ukiukkullu sikulerneranut naapertuuttunngortillugit aamma sapaatip akunnerata ulluisa aamma ullup unnuallu ingerlanerata assigiinngissusaanut naapertuuttunngortillugit.

Imm. 3. Misissugassanik tiguisarnerit sapinngisamik piffissamut sumiiffimmillu assigiaartunngortillugit agguataarneqarsimassapput. Taamaattumik erngup aqquataani ingerlaavartumik nakkutilliinerup ingerlanneqartarnissaanut arlalinnik paarlakaajaartitsilluni sumiiffinnik misissuiffusartussanik toqqaasoqartassaaq.

Imm. 4. Ilangussaq 2B-C naapertorlugit nakkutilliinissap akulikissusissaa annikillisinneqarsinnaavoq, qitiusumik nakkutilliinermut oqartussaasut nalilerpassuk, misissugassanik tigusat arlallit imminnut maliinnartut takutitsisut, pitsaassusissaatut piumasaqaatit oqaatigineqarsimasunit assigiaartunik

annikinnerusunillu akoqarneranik uppersaatissaqartoq, kiisalu killiliussatut oqaatigineqartup iluani mingutitsissutaasunik, imermik sukuuiagaannngitsumik aamma imerneqartartumik mingutitsisoqarsinnaanerani navianaataasinnaasunik takutitsisoqanngippat. Annikinnerpaamilli ukiut arfineq-pingasunngorneri – ukiut qulinngorneri tamaasa nakkutilliinermik misissugassanik tiguisoqartassaaq, ilanngussaq 1B-C naapertorlugit uuttuut/aalajangiisuusoqinut/aalajangiisuusunut tamanut misissoqqissaarneqartussanik.

Kapiteli 7

Aningaasartuutit, ingerlatsinermut allattaavik, nalunaarutit taakkuninngalu nalunaarutiginnittarnerit

§ 25. Tappiorannartunut uuttuutini/aalajangiisuusunik misissugassanik tiguisarnermut misissuisarnernullu aningaasartuutit taamaallaat peqqissutsimut naalakkersuisoqarfimmit akilernerqartarput, takuuk ilanngussaq 1A nalinginnaasumik imermik pilersuinermit atatillugu.

Imm. 2. Erngup akuinut pissusianullu uuttuutini/aalajangiisuusunik misissugassanik tiguisinermut misissuinernullu aningaasartuutit ingerlatsisuusumit akilernerqartarput, takuuk ilanngussaq 1B-C.

§ 26. Nalinginnaasumik inuussutissalerinermillu ingerlatsiviit imermik pilersuviinut ingerlatsisuusoq ingerlatsinermut allattaavimmik allattuisassaaq. Ingerlatsinermut allattaavik makku pillugit paasissutissanik imaqassaaq:

- 1) soda-mik, klor-imik, kalkimik tunisassianik aamma kitsiisarnissamut akoorutinik annertussusiliisarnermik annertussutsit,
- 2) imermik pilersuivimmik nakkutilliisarneq,
- 3) imermik pilersuivimmi ajornartorsiutaasinnaasut aamma
- 4) alat, erngup pitsaassusaanut pingaarutillit aamma innuttaasunut inuussutissalerinermillu suliffissuaqarfimmut erngup pilersuutigineqartup annertussusia.

Imm. 2. Ingerlatsinermut allattaavik ingerlatsinermut akisussaasumit atsiorneqarsimassaaq sivikinnerpaamillu ukiuni tallimani paarineqartassalluni.

§ 27. Ingerlatsisuusumit pineqartumi nakkutilliinermut oqartussaasumit piumaffigineqarnermini takutissinnaassavai:

- 1) Ingerlatsinermut allattaavik ingerlatsinerup nalilernerqarnissaanut uuttortaanerit ilanngullugit.
- 2) Pingaarnerusumik engup aqutaanut takussutissiat aamma aqutit isorisinnaasaat matusat imermik misissugassamik tiguisiffusartunut paasissutissartalerlugit.
- 3) Ingerlatsinikkut- aamma teknikkikkut eqqiluusaarnissamut paasissutissat tappiorannartorsiulluni nakkutilliinermi sumiissusersuinermit pingaarutillit.

§ 28. Nalinginnaasumik inuussutissalerinermillu ingerlatsiviit imermik pilersuviinut ingerlatsisuusumit erngup akuinik pissusianillu misissueqqissaarnermi angusat, takuuk § 24 imm. 4, sukuuiagaannngitsup imerneqartartullu pitsaassusiinik naliliinissamut, takuuk ilanngussaq 2B-C, avatangiisinut naalakkersuisoqarfimmut nalunaaruteqartassaaq tamakku takkunniariaraangata. Paasissutissanut taakkununga peqatigitillugu erngup sungarnissuanik pH-anik uuttuinerit aamma klor akuliussimannngitsaq aalajangersimasorlu pillugit akoqarnerit nalunaarutigineqartassapput qitiusuunngitsumik nakkutilliinermik oqartussaasumut, kiisalu tappiorannartorsiulluni nakkutilliinermut ingerlanneqarsimasumut atatillugit. Uuttuisarnerit ingerlatsinermut allattaavimmut allanneqartassapput.

Imm. 2. Erngup akuinik pissusianillu misissueqqissaarnermik angusat takkunniariarpata qitiusuunngitsumik nakkutilliinerup tappiorannartorsiulluni misissueqqissaarnermik angusat erngup

sukuluiagaanngitsup imerneqartartullu pitsaassusiinik nalilersuinissamut, takuuk ilanngussaq 2A, peqqinnissaqarnikkut nakkutilliisoqarfimmut, uumasut nappaateqartarneranni pissutsit pillugit naalakkersuisoqarfimmut kiisalu ingerlatsisuusumut aamma Danmarkimi Inuussutissat pillugit aqutsisoqarfimmut nalunaarutigisassavai.

Imm. 3. Avatangiisinut uumasullu nappaateqartarnerini pissutsit pillugit Naalakkersuisoqarfimmut nalunaarut elektronik atorlugu ingerlanneqarsinnaavoq. Elektronik atorlugu nalunaarutip isikkussaa qitiusumik nakkutilliinermik oqartussaasumit aalajangersarneqartassaaq.

§ 29. Nalinginnaasumik inuussutissalerinermillu ingerlatsiviit imermik pilersuiviinut ingerlatsisuusq ukiumut ataasiarluni imermik pilersuivinni ataasiakkaani erngup pitsaassusia pillugu nalunaarusiortassaaq. Nalunaarusiaq ukiumi ullorsiuteqarfusumi tullermi kingusinnerpaamik 1. juni nallertinnagu qitiusumik nakkutilliinermik oqartussaasumut nalunaarutigineqartassaaq.

Imm. 2. Imm. 1 naapertorlugu nalunaarusiaq makku pillugit paasissutissanik imaqassaaq:

- 1) erngup pitsaassusia,
- 2) imermik pilersuinikkut piginnaasat erngup pilersuutigineqartussap annertussia eqqarsaatigalugu,
- 3) pilersuutigineqartutut erngup annertussusii,
- 4) innuttaasut qanoq amerlatigineri,
- 5) §§ 37-40 naapertorlugit immikkut akuersissutigineqarsimasut, aamma
- 6) nalunaarut manna naapertorlugu pitsaassutsikkut piumasaqaammut ataatsimut arlalinnulluunniit sinniisimannngitsunik, imermik pilersuineranut pitsaassutsikkut piumasaqaatit eqquutsinneqarnissaannut pilersaarutaasutut iliuusissat.

§ 30. Qitiusumik nakkutilliinermik oqartussaasoq ukiut pingasunngorneri tamaasa ataasiarluni ukiunut ullorsiuteqarfusunut pingasunut matussusiisumik erngup pitsaassusia pillugu ataatsimoorussamik nalunaarusiortassaaq, piffissap nalunaarusiorfusup kingorna ukiup ullorsiuteqarfusup qaangiutinnginnerani tamanut nalunaarutigineqartartussamik. Nalunaarusiami siullermi ukiut 2008-miit 2010-mut matussusiivigineqassapput.

Kapiteli 8

Peqqussutit inerteqqutillu

§ 31. Qitiusumik qitiusuunngitsumillu nakkutilliinermik oqartussaasup nalinginnaasumik inuussutissalerinermillu ingerlatsiviit imermik pilersuiviinut, imermillu pilersuivinnut allanut ingerlatsisuusq, imermik pilersuivinnik allanik piginnittut, kiisalu illuni imermik atorulersuutininik piginnittut peqqusinnaavaat, erngup pitsaassusianik sukumiinerusumik misissueqqillugit aamma pitsaassutsip ajornerulersimaneranut pissutaasut pillugit imaattoqarsimappat:

- 1) ilanngussaq 1A-C naapertorlugu erngup imerneqartartup pitsaassusissaanik piumasaqaatit arlaat unioqqutinneqarsimappat, aamma
- 2) nalilernerqarpat, erngup imertut imerneqartartutut atornerqarnissaani peqqissutsikkut navianaateqarsinnaanera, takuuk ilanngussaq 3A.

§ 32. Qitiusumik nakkutilliinermik oqartussaasoq peqqussuteqarsinnaavoq ilassutaasunillu pitsaassusissamut piumasaqaatit aamma stoffinut tappiorannartoqarneranullu nakkutilliinermik periutsinik aalajangersaaqqusisinnaavoq, nalunaarummi matumani ilanngusani aalajangersarneqarsimannngitsunik, nalilernerqassagaluarpas, ima annertussuseqarlutik akoqarlutilluunniit akuusut peqqissutsikkut naviaanaateqalersinnaallutik.

Imm. 2. Qitiusumik nakkutilliinermik oqartussaasoq misiligitissanik tigutsivissanik nutaanik aalajangersaasinnaavoq misiligitissanillu tigutsivioersunik allanngortitsisinnaalluni, nalilerneqarpat taamaasiornissaq pisariaqartuusoq.

§ 33. Qitiusumik nakkutilliinermik oqartussaasoq nalinginnaasumik inuussutissalerinermillu ingerlatsiviit imermik pilersuiviinut, imermillu pilersuivinnut allanut ingerlatsisuusoq, imermik pilersuivinnik allanik kiisalu illuni imermik atortulersuutiniq piginnittoq peqqussuteqarfigisinnaavai pisariaqartutut makkuninnga aallartitseqqullugu:

- 1) Erngup imerneqartartup pitsaassusianik qularnaarinnittunik utaqqiisaasumik iliuuseqaqqullugit.
- 2) Erngup imerneqartartup pitsaassusianik aalaakaasumik pilersitseqqinniarluni iluarsissutaasunik iliuuseqaqqullugit.

Imm. 2. Imm. 1 naapertorlugu peqqussuteqartoqarsinnaavoq, erngup imerneqartartup pitsaassusissaanut piumasaaqat eqquutsinneqarsimanngippat ilanngussaq 1A-C naapertorlugu imaluunniit § 11 naapertorlugu nakkutilliineq tunngavigalugu, imaluunniit § 16 naapertorlugu ingerlatsinikkut nakkutilliineq malillugu, erngup imerneqartartup atorneqarnerani peqqissutsikkut navianartoqarsinnaaneranik takutitsisoqarpat.

§ 34. Qitiusumik nakkutilliinermik oqartussaasup peqqinnissaqarfimmi nakorsaaneqarfik tusarniareerlugu, imermik pilersuiveqarfimmit illulluunniit imermik atortulersuutaaniit erngup imerneqartartup atorneqarnissaa inerteqqutigisinnaavaa killilersorsinnaalluguluunniit, pineqartumi tassani atuineri peqqissutsikkut navianaateqartoqarsinnaappat, pisariaqartunillu iluarsissutissanik iliuuseqartoqareernissaata tungaanut.

Imm. 2. Imm. 1-mit atuineri eqqarsaatigineqassapput:

- 1) imermik imerneqartartumik atuijunnaarnermi killilersuilerinermiluunniit peqqissutsikkut navianaateqartoqarsinnaanera,
- 2) atuisunut attorneqartunut ilitsersuineq ilisimatitsinerlu, aamma
- 3) atuijunnaartitsinerup killilersuinerulluunniit atuutsinneqarnerini, imermik imerneqartartumik allatut pilersorneqarsinnaanissap pilersinneqarsinnaaneranut periarfissat.

Imm. 3. Tappiorannartoqarsinnaaneranut sinniisoqarsimatillugu qitiusumik nakkutilliinermik oqartussaasoq kaammattuuteqarsinnaavoq imeq qalaattaqqullugu, takuuk ilanngussaq 1A-C.

§ 35. Nalunaarut manna naapertorlugu aalajangiinerit tamarmik pisarput Peqqinnissaqarfimmi nakkutilliisoqarfik siumoortumik tusarniareerlugu. Tusarniaaneq oqaasiinnakkut allakkatigulluunniit ingerlanneqarsinnaavoq apeqqutaatillugu suliaq qanoq nukingertiginersoq.

§ 36. Peqqinnissaqarfimmi nakkutilliisoqarfimmit, qitiusumik nakkutilliinermik oqartussaasoq isumasioreerlugu, qitiusuunngitsumik nakkutilliinermik oqartussaasoq peqqusinnaavaa nalinginnaasumik inuussutissalerinermillu ingerlatsivinnut imermik pilersuivinnik, imermik pilersuivinnik allanik aamma illunik piginnittunik § 11 imm. 3 naapertorlugu immikkut ittumik nakkutilliisoqarnissaanik, naliliisoqassappat, imermik imerneqartartumik atuineq tassanngaannaq peqqissutsikkut naviaanaateqalersitsisinnaasoq.

Kapiteli 9

Immikkut ittumik akuersissutiginnittarneq

§ 37. Qitiusumik nakkutilliinermik oqartussaasoq imermik pilersuivimmik ingerlatsisuusumit qinnuteqaateqartoqarnerata kingorna immikkut ittumik akuersissutiginnissinnaavoq erngup

imerneqartartup, ilisarnaatitut aalajangiisartunik qalipaateqarneranik, tikkanik aamma mamassuseqarneranik, NVOC-mik, O

2

- mik atuinermik, iseriassuseqarneranik, kuuffigineqarsinnaaneramik, sungarnissusianik pH-mik, aluminioqarneranik, ammoniummeqarneranik, klorideqarneranik, savimineqarneranik, manganeqarneranik, sulfateqarneranik aamma natriummeqarneranik ilanngussaq 1B-mi aalajangersarneqarsimasunik, pitsaassutsimut piumasaqaatigineqartunik naammassinniissimanngippat. Taamatut immikkut akuersissutiginninnissaq piumasaqaatitalerneqarsinnaavoq, sapinngisamik piaarnerpaamik iluarsissutissatut iliuuseqartoqarnissaanik pitsaassusissatut piumasaqaatigineqartumut naapertuuttunngortitsilluni ilisarnaatitut aalajangiisartutut pingaarnerutitanik iluarsissuteqarnissamik.

Imm. 2. Imermik pilersuivimmit ingerlatsisuusumit immikkut ittumik akuersissutiginnittoqarnissaanik qinnuteqaateqartoqareernerata kingorna qitiusumik nakkutilliinermik oqartussaasup aamma Peqqinnissaqarfimmi nakkutilliisoqarfik tusarniareerlugu ilisarnaatitut aalajangiisartunit piffissamut iluarsissuteqarnissap ingerlanneqarnissaanut pisariaqartinneqartumut immikkut ittumik akuersissutiginnissinnaavoq, naatsorsuutigalugu, pitsaassusissatut piumasaqaatit sinnerneqarneri peqqissutsikkut navianaateqannginnissat.

Imm. 3. Taamatut pingaarnerutitanik qaffaasinnaannissaq taamaallaat akuersarneqarsinnaavoq, sumiiffimmi pineqartumi imermik pilersuineq ingerlanneqarsinnaassanngippat, imaluunniit imermik pilersuiveqarfimmit iluarsaassisoqassappat assigisaanilluunniit suliarinnittoqassappat.

Imm. 4. Pingaarnerutitat annertunerpaavanni immikkut ittumik akuersissutiginninnermini qitiusumik nakkutilliinermik oqartussaasumit nalunaaruteqarnermi, erngup pitsaassusaanik aamma iliuusissanik piffissamut immikkut ittumik akuersissutiginniffiusumut atuuttussani nakkutiginninnermut nakkutilliinissamik pilersaarummik akuersissutiginnissaaq.

Imm. 5. Ingerlatsisuusumit immikkut ittumik akuersissutiginnittoqarniariarnerani, imermik pilersuivimmit atuisut ilisimatissavai immikkut ittumik akuersissutiginnittoqarsimaneramik taamaasiornissamilu piumasaqaatigineqartut pillugit.

§ 38. § 37 naapertorlugu immikkut ittumik akuersissutiginninnerit utaqqiisaasumik atuuttuupput tunniunneqartarlutillu naatsorsuutigalugu, pitsaassutissatut piumasaqaatinik sinniisimanerit, ilanngussaq 1B naapertorlugu, peqqissutikkut navianartorsiortitsisuunngitsut, aammalu iluarsissutissatut iliuuseqarnissamut pilersaaruteqartoqartoq.

Imm. 2. Immikkut ittumik akuersissutiginnittoqartarsinnaavoq sivilunerpaamik ukiunut pingasunut.

§ 39. Immikkut ittumik akuersissuteqarnissamut qinnuteqaat paasissutissanik tulluuttunik imaqassaaq:

1) Immikkut ittumik akuersissutiginninnissamut pissutaasut qanorlu sivilutigissanersoq.

2) Erngup pitsaassusissaanut piumasaqaatit pineqartumi atuuttut, siusinnerusukkut misissueqqissaarsimanermi angusat attuumassuteqartut aamma erngup pitsaassusaanik piumasaqaataasunik annertunerpaatut akuersissutigineqarsimasunik sinniisinnaanissamik kissaateqarneq.

3) Nunap sananeqaataatigut sumiiffik imermik sulumiaagaanngitsumik pissarsiffusarteq pineqartoq nalunaarlugu, aamma erngup ullup tamaasa pilersuutigineqartartup annertussusia innuttaasunut aamma inuussutissalerinermik ingerlatsivimmut pilersuutigineqartartumut agguataarlugu.

4) Nakkutilliinissamut pilersaarut, pisariaqassappat nakkutilliinerup akulikissusia akulikinnerulersillugu.

5) Pisariaqartutut iluarsissuteqarnissami iliuutsinik aallartitsinissamut piffissaliussatut aamma

iliuseqarnissatut pilersaarut erngup pitsaassusaanik qularnaarinnittuusoq pilersiteqqittuusorluunniit.

6) Pisariaqartumik iliuusissanut pilersaarusionerup ataatsimut katinneqarnerat.

Imm. 2. Qinnuteqartumit namminermit paasissutissat attuumassuteqartut tamaasa qitiusumik nakkutilliinermik oqartussaasumut suliamik suliarinninnissami atugassat tunniunneqassapput.

§ 40. Qitiusumik nakkutilliinermik oqartussaasup naliliinera naapertorlugu imermut imerneqartartumut pitsaassusissatut piumasaqaatit arrortinneqarsinnaanngitsunik ilisarnaatitut uuttuut/aalajangiisuusoqinik/aalajangiisuusunik sinniisoqarsimasoq, ilanngussaq 1B naapertorlugu, peqqissutsimut navianaateqanngitsumik, aammalu iluarsiissutissatut iliuutsit sivilunerpaamik ullut 30-it iluini iluarsiissutigineqarsinnaappata, §§ 39 aamma 40 atornagit immikkut ittumik akuersissutiginnittoqarsinnaassaaq. Immikkut ittumik akuersissutiginninnermi nalunaarutigineqassapput:

1) pingaarnertutatut qummut akuerineqarsinnaasut, aamma

2) ajornartorsiummik iluarsiissuteqarnissamat piffissaliussaq.

Imm. 2. Tappiorannartoqarsinnaaneranik uuttuutininik/aalajangiisuusunik pitsaassutsimut piumasaqaatitsigut immikkut ittumik akuersissutiginnittoqarsinnaanngilaq, takuuk ilanngussaq 1A.

Imm. 3. Imm. 1 naapertorlugu immikkut ittumik akuersissutiginnittoqarsinnaanngilaq, imermik pilersuivimmi aalajangersimasumi erngup pitsaassutsissaatut piumasaqaatit taakku qaammatit qaangiuttut 12-it ingerlanerini katillugit ullunik 30-inik amerlanerusunik sinernerneqartarsimappata.

§ 41. Imermut imerneqartartumut puiaasanut allamilluunniit poorlugit tuniniarneqartartunut pitsaassutsikkut piumasaqaatit immikkut ittumik akuersissuteqarfigineqarsinnaanngillat.

Kapiteli 10

Naammagittaalliorsinnaatitaaneq

§ 42. Nalunaarut manna naapertorlugu aalajangiinerit naammagittaalliuutigineqarsinnaapput Inaatsisartut avatangiisitigut naammagittaalliortarnermi ataatsimiititaliaanut avatangiisit illersorneqarnissaat pillugu inatsisartut peqqussutaanni tamanna pillugu nalinginnaasumik malittarisassat naapertorlugit.

Imm. 2. Taakkununga ilaatinneqanngillat aalajangiinerit § 11, imm. 1, § 14 imm. 1, §§18-30 naapertorlugit aalajagiunneqarsimasut taakkulu inuussutissanik uumasullu nappaataannik nakkutilliineq pillugu inatsisartut peqqussutaanni tamakku pillugit nalinginnaasumik malittarisassat naapertorlugit Naalakkersuisunut naammagittaalliuutigineqarsinnaapput.

Kapiteli 11

Pineqaatissiisarnermut aalajangersakkat

§ 43. Akiliisussanngorlugu eqqartuunneqarsinnaavoq inuk:

1) §§ 15-24 naapertorlugit erngup pitsaassusaanik misissueqqissaarnernik isumaginninngitsaq.

2) §§ 26-29 naapertorlugit qitiusumik nakkutilliinermik oqartussaasumut nalunaarutigininngitsaq.

3) § 28, imm. 1 aamma § 29 naapertorlugit imermik atuinerimik nakkutilliinngitsaq imaluunniit nalunaarutigininngitsaq.

4) §§ 31-34 aamma § 36 naapertorlugit aalajangiinernik sumiginnaasoq.

5) § 15 aamma §§ 27-29 naapertorlugit nalunaarsuinerimik angusanilluunniit paarinninngitsaq, imaluunniit tamakkuninnga qinnuivigininneq malillugu takutitserusunngitsaq.

Kapiteli 12

Atortuulersitsineq ikaarsaariarnermilu aalajangersakkat

§ 45. Nalunaarut 1. marts 2008 atortuulerpoq.

Imm. 2. Peqatigitillugu "Erngup imerneqartartup pitsaassusaanut taassuminngalu nakkutilliinermut malittarisassat" Naalakkersuisunit ulloq 27. august 1990-imi akuersissutigineqarsimasut kiisalu Kalaallit Nunaanni nakorsa qarfinni imermik misissuisarneq pillugu Nakorsaaneqarfiup kaajallaasitaa nr. 20, 26. januar 1990-imeersoq.

Imm. 3. §§ 26 – 30 aatsaat atortuulissapput 31. december 2008, taamaasilluni § 30 naapertorlugu erngup pitsaassusia pillugu ilisimatitsissut tamanut saqqummiunneqassalluni siullermik ukiumi 2009-mi.

Imm. 4. Kalaallit Nunaanni nakorsa qarfinni imermik misissuisarneq pillugu Nakorsaaneqarfiup kaajallaasitaa nr. 20, 26. januar 1990-imeersoq naapertorlugu aalajangiinerit atuupput, nalunaarut manna naapertorlugu allamik aalajangiisoqarnissaata tungaanut.

§ 46. Kapitali 5 aamma nalunaarummi matumani ilanngussat naapertorlugit imermik pitsaassutissatut piumasaqaatit eqquutsinneqarsimasussat, eqquutsinneqarsimassapput kingusinnerpaamik 1. januar 2009, §§ 37 - 42 naapertorlugit immikkut ittumik akuersissutiginnittoqarsimatinnagu. Piffissap tamatumap tunngaanut manna tikillugu pitsaassutissatut piumasaqaatit atuuttut eqquutsinneqarsimassapput.

Imm. 2. Nakkutilliinermut programmit, nalunaarummi matumani kapitali 5 aamma 6 ilanngussallu naapertorlugit suliarineqarsimasussat, kingusinnerpaamik atortuulersinneqarsimassapput ulloq 1. august 2008-imi. Taamatut nakkutilliinermi programmi atortuulersinneqarnissaasa tungaannut, manna tikillugu nakkutilliinermut programmit atuuttut atuutsiinnarneqassapput.

Namminersornerullutik Oqartussat, ulloq 17. marts 2008

Kim Kielsen

/

Steffen Ulrich - Lynge

Ilanngussaq 1a (pdf-format)

Ilanngussaq 1b (pdf-format)

Ilanngussaq 1c (pdf-format)

Ilanngussaq 2a (pdf-format)

Ilanngussaq 2b (pdf-format)

Ilanngussaq 2c (pdf-format)

Ilanngussaq 3a (pdf-format)

Ilanngussaq 3b (pdf-format)

Ilanngussaq 4 (pdf-format)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut